

汝龍縣志

第九冊

海龍縣志卷十八

古蹟

海龍明時屬輝發部落自清康熙十六年長白山升祀後遂留作圍場荒廢二百餘年故境內舊蹟幾全湮沒無從稽考刻除古碑古城古墳一二殘存外別無他物茲分列於後以備參考焉

古碑

城西南一百二十里楊樹河子界內北山頂上名摩崖有金人勒石一爲女眞字已經省方派工榻拓譯其文爲金兵至此而礪此碑（另有專記）

通州楊公清頌之碑

光緒十一年春郡尊楊公將去吾郡郡之人咸奔走嘯唏而相告曰
公將去矣可若何公原通州籍年邁思歸公之志也衆欲留之而不
可得猶憶公之蒞吾郡也五載善政逮下咸茹休澤使無以記之其
何以昭公之惠且俾我後人知也於是作頌以彰厥美頌曰於維我
公蒞我海龍肫肫黽黽牖啓愚蒙海龍之初厥惟鮮圍圍場旣開民
始來歸安民設官公來刺郡布政施仁有條不紊厥政惟何學道愛
人下車觀風首重斯文公之言曰旣庶且富富而不教近於禽獸創
立學校獎拔孤寒嚴純苞苴士心大懽嗟我農夫幸逢盛治不聞吏
呼不違農事凡諸徭役一無所用每當夏秋輒爲停訟通功易事商
旅雲屯罔非公德共沐公德公之待民心存仁恕如保赤子鞠育顧

復矜恤訟獄尙德緩刑有恥且格春草滿庭獨至盜賊不少寬假刑人于市往往泣下論公之政曰清慎勤論公之性曰禮義仁求之古人黃霸龔遂側公其間庶幾無愧清白之裔不名一錢儒林循吏裕後光前公之來矣吾民是喜公之走矣吾民傷悲如何勿思其淚如雨作頌勒銘垂千萬古

謹按公諱文圃字

晉卿

光緒六年冬間來任碑則立於去任時也

時值倉卒而又地不產石故刊木以志去思越歲冬聞公歿於省寓還我使君之望竟不可得矣思公之德因而愈深是非壽諸貞氓不足以垂久遠爰乃伐石於藩之陽大書深刻上麗三光庶足報公萬一乎

門生姜兆棟謹跋

乙亥恩科舉人文杰書丹

大清光緒十三年歲次丁亥夏五月穀

立

閤郡紳士等仝立

城隍廟碑

善惡賞罰冥司具有平衡福禍報施幽錄自存公道其惟

城隍聖鑒洞察默化潛移草莽愚民始知警勸風化於斯分厚薄天
理亦於此驗循環故凡地方有一官卽有一神所謂陰陽無二理也
查海龍縣城建署之初經前任馬總管楊通判創修此廟工料爲艱
營治固難經久及_祿於十四年接署斯任朔望展禮仰視廟貌疎漏
地基傾窪不禁爲之警惕因與通判_汪稟和衷籌商_祿首先倡捐廉

銀百兩桌捐廉五拾兩左右翼長亦各捐銀五拾兩駐圍奉軍一營捐銀百兩廳署並八旗等官馬步各隊營總扎蘭統共捐銀六百餘兩復藉巡圍道經各處廣爲募化商民樂輸又捐集銀一千四百兩因覓工備料晒勘地勢由西南土城角下開挖水洞一道以漏淤水另墊地身謹將正殿遷移西首重新折修添建兩廊山門套砌四面磚礲塑繪金身油飾棟宇煥然一新於十七年春功告厥成藉衆力之資助愜一念之虔維神弘敷蕃祉愛育羣生俾四序暢遂圍境咸沾嘉惠百穀豐稔邊氓共樂昇平鴻福優加庶深依庇敬禱丹誠尙乞鑒諸因鐫碣石用昭將來南門外火神廟每逢朔望有拈香者均歸此廟道人看護一切不得有悞附載碑左昭示遵行

于府君諱學富之碑

夫推梨讓棗共欽同氣之雍和而子鶴妻梅爭歎高風之卓越此在詩書之士猶或能爲而於畎畝之人愈歸難得惟于府君諱學富幼而居貧長不易節綜其行誼咸可表揚考之身心眞堪欽慕先世居住復州生計僅能自給家貧親老徒傷娶嫁無資時難年荒益致米鹽莫繼所餐惟木葉樹皮得榆爲美遮身乃牛衣鶉結仰屋徒嗟於是府君奮然作起惘惘出門思糊口於四方茫茫前路焉託身以卒歲爰奔懷德仍與爲傭煙蓑兩笠旣作嫁之年年節食省衣仍空囊而漑漑再赴雞林另謀蝸寄遂佃田而自種幸占歲之有秋膏腴土出產爲優淡巴菰獲資非細自此就食東遷因而舉家共往松花江

邊殷勤力作甌脫地內收穫頻仍乃積年漸有餘蓄遂有人願爲作
伐同娶度力既不能急難猝辦推誠甘人以相讓徐俟後圖因思得
一人與主中饋爰謀與三弟先獨成家未幾遂遇海龍出荒於焉再
效春鶯擇樹來居雙頂願授一廛田需火以爲耕屋牽蘿而待補雖
戴月披星而門庭皞皞卽胼手胝足而兄弟怡怡自此年復一年常
致讓而又讓歲月蹉跎不知老之將至光陰荏苒竟爲鰥者以終旣
而見弟生子乃喜猶子比兒非無螟蛉可嗣恐因轉致參商但得烏
鳥知恩究亦何分子姪竭力持家晚年不懈畢生食力至老猶勤共
有猶子三人各使讀書數載乃愛長姪紹亭遂使棄農多讀詎以時
難年荒竟至中途輟業時府君已老幸姪可以分勞乃家政代操息

肩固非本意爰隆以孝養致其敬恭凡事順志承顏每食請欲投好
洎府君疾病既困莫能興而次姪挾持尤勞而不倦既乃告終急爲
立嗣是生不忘其教養歿不絕其宗支於義於禮咸得其宜事死事
生交合乎道因爲銘曰府君幼貧困居鄉里纔逾弱冠奮然而起奔
走四方寢息弗遑頻年勞力未進寸長爰往吉林居江之濱種菸得
利與弟先婚同娶弗能甯鰥以終有姪如子何必親生姪能孝養甘
旨克享烏哺酬恩豔稱里鄙生隆其事死致其禮存不繼男歿爲立
嗣府君之風旣山高而水長府君之侄亦知恩而尙義

海龍縣志館館長簡任職用王蔭棠敬撰

龍王廟碑

古之人建廟設祠爲彰善癉惡之地祈年禱雨之所使一方之人有所瞻仰有所忌憚誠善舉也余境自開荒以來即有龍王廟九聖祠一所南襟（柳）流水北枕峻嶺東則道路之廻轉如羊腸之蟠繞西有崇山峻嶒如錦屏之排列一方勝境莫逾於此而四方香火曾無斷絕所以消災於一方暗護默佑於四時者正賴地靈與神庥也無如歲遠年湮風雨凌侵畫棟也而朽腐醵頷也而廢頽前日之名祠勝境頓爲悽慘之坵墟矣鄉中父老不忍坐視於是共捐資材重加整修廟祠二間仍因舊貫神佛數尊繪塑如前不數日而告竣焉雖無殿閣之輝煌樓台炫耀而廟祠紳像亦較前煥然一新矣吾鄉父老囑余作文以誌之余亦忘其固陋遂聊叙巔末以示後人之相繼

修葺使廟祠之永垂不朽云

龍母聖祠

邵蔭棠

嘗聞供奉慈雲特表信行之志莊嚴紺宇用彰瞻仰之誠惟茲海龍
城西境界圍塲元年升科安民納課居斯土者俱被皇恩但山深野
僻商賈不通榛楮濟濟河水洋洋道阻且躋道阻且長欲鑿山開路
以爲通衢俾往來行人視爲坦途并創立廟宇以乞庇護金碧輝煌
棟梁壯麗蓋非一朝一夕之所能爲也故庀材者幾何日鳩工者幾
何日設像製衣者又幾何日歷數年功乃告竣欲修廟宇先修道路
道路旣通聖祠已就勉襄盛事端賴賢能所謂多多益善宦遊頻頒
鶴俸源源而來路客亦助蠅頭好善有同心樂施無靳色從此蓮花

座下共沐春風楊柳枝頭盡沾雨露衆神之靈爽有憑吾輩之蒙庥
無已庶蟲雹旱澇永不爲災王道蕩蕩王道平平化行俗美人和年
豐祚我聖朝祐我黎元勒諸貞珉以垂不朽云

海聖宮碑

爲光緒元年海龍圍塲仰蒙聖恩俯准升科居民得所固皇恩之浩
蕩寔神靈之點佑舊有茅屋一椽供奉神聖但規模狹隘不但無以
慰神意抑且無以壯觀瞻會末人等因公同酌議仍在舊所建修觀
音殿三間龍母祠一所九聖祠一所鐘鼓樓各一名曰海聖宮又因
嶺道險阻議鑿西山坡爲堤以便往來本屯衆戶欣然樂從悉捐貲
相助猥因工程浩大建修匪易又募於四方幸得諸善士成此勝舉

由十七年三月吉日興工十八年八月竣工爰誌其事永垂不朽粵
稽軒轅帝世爲五城十二樓阿育王時造八萬四千塔他如禮佛寺
四百八十證道場六萬三千蓋以敬恭之意非有所注則莫伸如在
之忱非有所臨無以達此所以類禋之典備於虞書禘祭之儀詳於
周禮也是宮也厥名海聖方其作也倡椽得主任事有人紳宦之布
施不少農商之捐貲亦多願發慈悲不屑錙銖之較心殷享祀遂結
歡喜之緣於是剪棘誅茅拓其他址輩石運木庀彼良材諏吉興工
造就蘭宮梵宇長齋繡佛居然福地瑯環經之營之雖是斯人之力
美矣備矣足徵我佛之靈其爲地也柳河南繞而鏡清墨山北枕而
軒敞其右也長堤平坦車馬之往來甚便迥異乎秦關蜀道其左也

籬落蕭疎雞犬之吠鳴相雜何殊乎武陵桑麻其爲制也畫檻周迴
彫甍錯綜輝煌映日赫然有耀者殿宇之崢嶸也層疊陵雲巋然相
對者兩樓之聳峙也輦斯飛而鳥斯革煥乎其光昭也飾以藻而節
以山廓乎其軒豁也似龍鱗之耀日猶雉羽之淩風石基孔固默頭
之頑石可驅雲棟齊飛覆體之慈雲遠映其中無殲垢塵氛洵是蓬
萊之境此處有風樯月戶宛開兜率之天而其爲義也取乎海不揚
波佐我聖明有道渡寶筏於迷津四海之蒙庥無極尊金身於法座
上聖之靈爽有憑法雨微霏灑遍山陬海澨春風鼓盪被及地角天
涯納芥子於須彌是空是色湧蓮花之世界無滅無生以故安我樂
土福我羣氓神靈有託方隅肅清造民生之福命隆作鎮於斯村爰

爲銘曰新廟翼翼孔曼且碩倬雲漢兮鎮乾坤兮神之格恩降福縣
兮有同志者後紹前兮嗣而葺之永萬年兮

海龍縣文廟翻修記

夫孔道昌明如經天之日月凡我國人無不尊親故自魯哀公爲孔
子立廟以還歷代之建祠追封禮制有加洎乎

新國肇造尤爲尊奉全國名地無不崇其廟貌隆其祀典蓋以崇德
報功示民有則也我縣文廟攷其歷史自清光緒二十八年經旗署
總管依公凌阿募款建修迄今數十年從未修理以致殿祠摧毀牆
廡傾頽全部破壞實難再延永恩於康德二年乙亥之冬奉令來長
斯邑觀此情形復以職責攸關實不能已於懷者故特與船山參事

官核議決定翻修然以需款浩繁縣中預算僅有二千金不敷甚巨爰特組織委員會公擬釀金辦法所幸邑人君子當仁不讓熱心捐助不旋踵已募有成數遂於康德三年七月十八日興工同年九月十八日竣事需款國幣伍千餘元需時不過六十日全部得觀厥成實堪欣慰者也此次雖爲翻修極同新建從此魯殿靈光永振龍城之文運不獨永恩之幸亦地方之福也謹叙始末以爲後之過此者畧作參攷焉是爲記

海龍縣縣長王 永 恩

參事官 船山德輔

康 德 三 年 九 月 十 八 日

關帝廟碑

伏維

關聖帝君道光宇宙德貫古今神靈首出俯佑國朝豐功屢顯故封號疊上祀典獨隆不惟省郡州邑各建專祠村鎮農商亦知供奉盛德至善無復加矣查海龍城設官之初經前任馬總管楊通判創建廟宇工料維艱規模粗具又經歷歲時風雨吹殘祿於十四年接署斯任朔望展拜仰視廟貌不堪實深驚懼祿因與汪通判崇和衷籌商祿首先倡捐廉銀百兩崇捐廉銀五十兩左右翼長亦各捐銀五十兩駐圍奉軍一營捐銀百兩廳署及八旗等官馬步各隊營總扎蘭統共捐實銀六百餘兩除隨覓工購料外祿復恐修費不足復藉